

山右石刻叢編

山右石刻叢編卷二十一

贈主事詔諭司職方部侍郎兼都察院右副都御史巡撫山西兼管提學政印務制太僕寺卿內閣學士



大雲禪院碑

碑分二截高三尺九寸廣一尺九寸上截勅牒十二行行
字不等下截二十三行行二十七字正書額題勅賜大雲
禪院六字篆書

尚書禮部牒

解州聞喜縣神栢莊院僧法圓狀告本莊院自來別無名額已納訖合着錢數乞立院名勘會是實湏合給賜者

竊奉

勅可特賜大雲禪院牒至准

勅故燦

大定三年六月二十日令史向昇□□主事安假權官
押

奉議大夫行太常博士權員外郎劉

中散大夫行員外郎李

宣威將軍郎中耶律

押

侍郎

中奉大夫禮部尚書翰林承旨知制誥修國史王

昔周昭王甲寅歲四月八日忽有神光飛照殿庭昭王以問
太史令蕞由對曰西方當有大聖人生厥後一千年教必行
于此至東漢明帝永平七月上元之夕帝夢金人騰空而下
俄至殿前帝乃驚異詢諸朝臣太史令蔡愔對曰臣聞西域
之神巍巍乎獨出三界之外名之為佛埜下所夢其將是乎

帝大悅即遣羽林郎中秦景博士王遵等西迎佛教至大月
支國果遇摩騰竺法蘭以白氍毹釋迦像并四十二章經構
白馬興聖十寺真宗既至迺殊二門彼此相參渾為一教蓋
易洪爐為道場之號改俗士為和上之稱如斯異事亘古傳
今簡牘昭昭靡克備載由是大教興隆邪徒隱蔽佛祖遺風
因茲韋盛者矣

解州聞喜縣之西北陰神栢有古佛堂廨院一所昔於正隆
年間絳州正平縣正覺寺僧法圓者其人碧苾芻草以嚴身
芬陀利花悅其意鄉人仰其德重請住茲監脩完纔備然舊
無名額至大定改元壬口歲方遇朝廷頒行祠部特賜名額
仍勒自來脩造有力檀那主首法圓口化到邑人各損資財
同營福地親詣本縣

勅牒一道題之特賜大雲禪院法圓至大定十二年九月十五日捨施與永寧寺永為常住下院輪選住持現住持僧永俊其人性自仁賢戒月冰清善巧良多智深志遠慮年代滯遠損墜无據乃刊石永傳不朽云爾

大定十三年七月二十八日現住持沙門僧永俊立石

永寧寺受業僧永信 永俊 永仁 永和 永脩 永倫 永仙

上院前住持習律沙門定登 重行道僧

現住持沙門定志 解魄僧

傳大乘戒講經律論沙門定因

傳大乘戒講經律論沙門法順

大定三年合山僧三百

按碑前列尙書禮部牒大定三年六月日云云見太清觀
牒後有記言解州聞喜西北陰神柏有古佛堂廨院一所
正隆年絳州正覺寺僧法圓修完纔備大定壬辰賜名額
仍勒捐資按所謂捐資者卽牒言合納錢數通志金石記
宋時凡天下名勝寺觀等奉敕行查給賜牒額或州縣陳
請求給勘合至金則納錢百貫方准給牒斯爲濫矣聞喜
縣志補金敕賜大雲寺牒大定十三年今搨本大定十三
年七月二十八日立石與補志合聞喜縣志大雲禪寺在
城西神柏村

慈雲院碑

碑連額高五尺八寸廣二尺一寸五分上下兩截上截刻
牒十三行行字不等下截銘二十四行行四十字正書額
題勅賜慈雲院額六字篆
書今在臨縣東南五十里

尚書禮部牒

石州臨泉縣小上谷村院僧顯京狀告本院自來別無名額已納訖合着錢內見錢伍拾伍貫粟米貳拾捌石伍斛壹升准省錢肆拾伍貫計錢壹百貫文乞立慈雲院名勘會是實湏至給賜者

牒奉

勅可特賜慈雲院牒至准

勅故牒

大定三年十二月 日令史向昇押主事安假權官押

奉直大夫行太常博士權貢外郎劉押

中憲大夫行貢外郎李

宣威將軍郎中耶律

侍郎

中奉大夫禮部尚書兼翰林學士承旨知制誥修國史王
慈雲院銘

唯一真法性智體圓暢萬行齊修隨緣理事爰居苾蒾播
鷲峯道邁百王邪徒未久故我

在尊開八萬法門度百億世界利樂人間作大歸依堪能可
信孰詮此理未之有也幸釋門子顯京篤實人也先出家於
石州天寧寺禮法義為師義以法乳兄法理辨道尊宿行門
無倦承慶壽寺請住持浴室院兼主大藏不忘手足之愛行
善相從將京寄度同理諸子仰慕屢為推許教門職事堅固
道心精勤 佛事務為修崇隨方異處各建道場力能成就
至如顯京最為上首致為佛子之因機慕良田特為蓮社臨

泉縣小上谷村號雲家山有古 佛堂一所當天會七八年
間干戈未定盜賊充斥屯軍把截焚毀殆盡顯京於時尚為
淨人誘化善士重興 佛堂落髮受具之後復修精舍鑄洪
鍾印藏經度弟子善登買墳地彫圓覺上生金剛般若法華
戒經等板並資常住可度後人日往月來修完出力未嘗且
止既成次第恨無名額終日癡迷常自念言正如綵繪西子
未點眉目何當滿是願也一日 朝廷有旨許天下寺院得
以進納遂其素志若憂早成霖未足為喜急速括搜橐囊所
用幻財及結緣檀越而進買之選罕賜額書曰慈雲久已成
清淨園同居精舍所觀聖跡叨鑒成功邁古超今未之有也
乃聖居之異端一奇敷宇岫出群峯祇蘭聽佛聞梵音警群
生之悟心之一妙門也稟資構祝

聖皇感應明朝萬德之尊樂業千秋干戈永息實有顯京功
能已就衆聖粧嚴四衆歸依無不瞻仰觀照慈雲迴福未盡
善也誌募援筆造銘刊石子不墜焉

淨覺老人趙為記

住持管勾院事門人僧善登立石

本州上院慶壽寺掌經藏浴室院前都綱尊宿僧 法理

住持脩經閣門人僧 真顯 真善

前住持丞買院額僧 顯京 顯能門人僧善登 善澄

善慶師孫宗教 宗炤 宗智 宗宣 宗性 慈心

慈周 慈淵 慈贊 慈輝

前住持臨泉縣普化院歿故先師和尚法義門人僧顯遠

顯才 顯祥 顯珪 普充 普輝 普現 普中

法眷院平夷縣壽峯院僧真惠門人善遵 善遷

圓明禪院僧真遠 方山縣福昌院僧真辯真喜門人善

滿 善蘊

鄉官丞奉郎行晉寧軍吳堡寨飛騎尉賜緋魚袋楊庭筠
承信校尉行臨泉縣主簿兼縣尉韓璣

朝列大夫行臨泉縣令騎都尉太原縣開國男食邑三百
戶賜紫金魚袋王衮

儒林郎石州軍事判官武騎尉賜緋魚袋范時可

中議大夫同知石州軍事上騎都尉弘農縣開國子食邑
五百戶賜紫金魚袋權州楊侯

定胡縣香嚴禪院僧真嚴 洪濟院僧 善霖

本州天寧萬壽禪寺僧法閏 法湛 法章 法廣 法

德 法演 法順

太平禪院前都綱講經論傳戒沙門 法益

管内都綱知教門事 釋 喜庸

文水縣孝義村趙時穩書

大金大定十三年癸巳歲十月十五日謹記

玉亭陳裕刊并篆

碑前刻金賜慈雲院牒枝金趙安上陵川龍巖寺碑大定
三年二月詣本軍軍資庫輸錢承買此碑亦云納錢一百
貫與福智禪院等牒錢數合牒末所繫銜亦同後刻慈雲
院銘云天會七八年間干戈未定盜賊充斥屯軍把截焚
毀殆盡按金天會七八年卽宋紹興三四年時金甫得中
原民心未服而徐徽言方力守晉甯與金抗見宋史諸書

所云盜賊者皆宋之義民也末題淨覺老人趙爲記碑末
所題諸官有承奉郎行晉甯軍吳堡寨楊庭筠承信校尉
行臨泉縣主簿兼縣尉韓獻朝列大夫行臨泉縣令太原
縣開國男王袞儒林郎石州軍事判官范時可中議大夫
同知石州軍事宏農縣開國子楊候文水縣孝義材趙時
穩書玉亭陳裕刊今山西永甯州有玉亭驛据碑則金代
已有此地名矣碑內有臨泉縣平夷縣方山縣按金地理
志石州縣六有臨泉方山而無平夷蓋平夷甯鄉之舊名
明昌六年更大定年尙未更名也碑見通志金石記

慈相寺關帝廟記

碑連額高三尺六寸廣一尺七寸四分二十四行行四十
九字正書額題建關眞君廟記六字篆書今在平遙縣

荆南玉泉山寺關將軍廟記

丞相張天覺無盡居士撰

過去陳隋間有大法師名曰智顗一時圓證諸佛法門得大
摠持辨說無礙敷演三品摩訶止觀是三非一是一非三即
一是三即二是一是二是一非一非三隨衆生根而設初後
至自天台止于玉泉冥坐林間身心湛寂此山先有大力鬼
神與其眷屬特恃憑據以通力故知師行業即現種種諸可
怖畏虎豹號躑地嶙盤瞪鬼魅嘻囁陰兵悍怒血唇劒齒毛
髮鬚髯妖形醜質倏忽千變法師怒言汝何為者生死於幻
貪著餘福不自悲悔作是語已迹音悄絕頽然丈夫鼓髯而
出我乃闕羽生於漢末值時紛亂九州瓜裂曹操不仁孫推
自保義臣蜀主同復帝室精誠激發洞貫金石死有餘烈故
主此山所嗜惟殺所食惟腥諦觀法師具足殊勝我從昔來

本未聞見我今神力變見已盡而師安定曾不省視汪洋如
海非我能測大悲我師哀愍我愚方便攝受願捨此山作師
道場我有愛子雄鷲類我相與發心永護佛法師問所能授
以五戒神復旨曰營造期至幸少避之其夕晦冥震霆掣電
雷鞭鬼箠万壑浩汗湫潭千丈化為平址黎明往視精藍煥
麗簷檻欄楯巧棄人目海內四絕遂居其一以是因緣神亦
屑食千里內外同洪雲委措違有督怠慢有罰捐施金幣匍
匐恐後玉泉以甲寅神之助歲越十稔魔民出寺網頽紊
捉拂虛設神既不佑廟亦浸弊元豐庚申爰有蜀僧名曰承
皓行年七十所作已辦以大衆請倏然赴感有陳氏子忽作
神語自今已往祀我如初遠近播聞瞻禱逾肅明年辛酉廟
宇鼎新尔時無盡居士聞說是事迺其贊之

炎劉之季天下三分鼎足而立主求其佐臣遇其君相湏盡
才智之能以赴功名之會者其事班班至于里巷之童兒閨
窻之女子亦能言及其著乎人心也極深將軍関羽者為時
名將以韜略英雄信義忠貞臣于蜀主而諸葛孔明謂驎之
逸倫絕群其才有足稱卓然所立者昭昭于國志之書載之
詳矣大定十三載寺主澄公新將軍廟貞于法堂東廡之間
予因暇日過慈相寺有虎溪之會而問公公曰今茲天下仰
藍奉此者為護法之神予冥然不知所語尔後得丞相張天
覺無盡居士文集中載開將軍廟記云昔陳隋間有智顗禪
師宴坐于玉泉山寺之中以佛之威德神通三昧接將軍之
靈變及其部衆親為授戒而將軍與其愛子誓心歸向護其
佛法立其寺宇而文中所記備言始末此不幾乎語恠力乱

神之事欤予為儒者烏可雷同其說然而天覺之文胡為乎
述此予以張公口賢相之才德業最高聳動朝野言行相副
可為法則博物洽聞有物外超然之見則于雲長之英烈豈
無所據哉而法師澄公篤信于是當禪定之餘嚴潔祀事以
資冥助而夢中神游與將軍相會有感應者至于再三因以
遺文刻諸翠琰俾佛子之信者以永其傳浩然居士郝瑛謹
題

監寺僧福杲

僧福恩書

當寺住持都修造主沙門福澄立石

平陶史楫篆并男偉摹刊

按碑前標題荆南玉泉山寺關將軍廟記丞相張天覺無
盡居士撰其實則慈相寺關帝廟碑而郝瑛作記也前半

自大定十三載上全用天覺原文故以之標題按宋史張
商英傳字天覺蜀州新津人調通州主簿知南川縣以章
惇經制夔夷得其喜意歸薦召對以檢正中書禮房權監
察御史後因言事語侵樞臣詔責監荆南稅然則此碑前
題荆南玉泉山者蓋在商英責監稅時所作又商英有長
者龕記後題政和戊戌十月望日觀文殿大學士張商英
題付宗悟商英作相以本傳宰相表及長編拾補諸書攷
之在大觀四年然則當荆南撰碑時並未爲相後人追題
之耳此碑郝瑛引商英原文似不以爲信故有怪力亂神
之譏然又稱其德業最高聳動朝野蓋商英前附章惇王
安石後結蔡京始得大用及乎執政遂矯蔡京所爲頗收
賢譽當時已爲所惑無怪郝瑛復震爍之也今事蹟具在

本傳前後合勘可以知其爲人矣按年表庚申元豐三年辛酉四年在章惇經制蠻事後商英以此時撰碑則正在荆南也又按大定十三年慈相寺主新闢帝廟貌於寺內始立此碑平遙縣志慈相寺在縣東十五里冀郭村古名聖俱寺唐無名祖師自西極來居麓臺山四十年肅宗召至京問答稱旨上元初化詔還故山宋慶厯間砌塔藏之高三百尺又名麓鏡臺碑後署浩然居士郝瑛謹題監寺僧福泉福恩書當寺住持都修造主沙門福澄立石平陶史揖篆惟福澄名見此碑其他可補志闕太平寰宇記平遙本漢平陶縣後魏以太武帝名肅改平陶爲平遙碑題平陶從漢稱也

碑連額高五尺二寸二分廣一尺八寸十六行
行三十八字正書額題四字篆書今在沁源縣

沁州沁源縣太清觀記

起復奉議大夫行大理司直騎都尉河南縣開國男食邑
三伯戶喬展撰并書

顯武將軍西上閤門使上騎都尉平原縣開國子食邑五
伯戶左光慶篆額

沁源縣之西北隅其地連紫金山麓橫岡逶迤俯瞰井落有
大松數十百本鬱然森秀蔽虧雲日

昭惠靈顯祠實屈其閒歲時奉香火者憧憧不絕 始縣吏
閻密屏棄俗累而受□□以符水治病有靈通即祠西地為
菴請范公先生與之居先生名道素字純夫平陽之洪洞人
天資朴野若不能言而邈於禪理人莫見其際邑人穆師古

卜師中從而師事之。屈是者，餘二十季。閤戶解而去。范亦歸隱霍山。閤之妻王妙信率其侶建

三清殿、靈官堂于菴居之東廊廡，門墻咸與。是稱大定中

詔天下老佛之居，未列通籍者，聽納。貴請名閤之子，金以是應。

詔遂賜額為太清觀。士豪武授李輔輩入金縣官，度師古師中為道士。師中施縣東之田三百畝，充常住，以贍給之。且遠走京師，訪予而言曰：「吾邑處山谷間，頗有林泉之勝。琴高生真字在焉。將有隱君子振仙風于千載之下。然念初學者山屈僻陋，未嘗見書而於文。文無從悟入。今欲置六經諸子道家之書以遺後之人，使藏而讀之，庶幾有所發明而為入道之漸。子以為何如？」予聞而歎曰：「善哉！君之用心，所謂三教融

通而無滯者是可嘉也因為作之記并錄其言俾歸而刻諸石儻異豈有得道如琴高生者知自我公發之十有四季四月二十六日記

知觀卜師中立石

張補刊

按碑題起復奉議大夫行大理司直騎都尉河南縣開國男食邑三百戶喬展撰并書顯武將軍西上閤門使上騎都尉平原縣開國子食邑五百戶左光慶篆額左光慶據碑題銜可補志傳之闕碑有大定中詔天下老佛之居未列通籍者聽納貲請名等語與太清觀等牒同琴高生見列仙傳太清觀据州志在沁源縣西北隅紫金山上金天會年閻密結庵尸解於此其徒衆建三清殿於庵東大定年賜額與碑合志所謂徒衆應卽碑內師古師中末題十

有四年四月二十六日記知觀卜師中立石僅有年數而無紀元按碑文卽爲大定十四年碑見寰宇訪碑錄

喬仲章事輯

喬辰字仲章鳳臺縣志一字君章初名逢辰洪洞人天德三年

進士

中州集小傳

官大理丞

申天祿興慶池詩跋

改華州蒲城丞正隆之

季關陝空虛華州密邇商鄧人心搖動令與尉皆挈家遁去君召耆老告之曰今事勢如此南軍且至爾等何以禦之皆曰有降而已君復好謂曰國家之興實天所授人荷寬政亦已久矣其忍負之乎苟如所言將捨順效逆一旦朝廷以偏師至南軍奔潰不暇從之而去者爲官軍所乘皆死於蹂躪其不能去者責以背叛孥戮之今丁口數萬同一心力足以自固吾爲爾等計莫若善壘浚隍厲兵積

粟吾雖不肖願率先父老以圖共守此萬全策也衆皆喜
曰敬受令於是增卑培薄躬執畚鍤以道其衆不浹旬而
城完乃料揀丁壯得二千人悉令登陴又選精銳百人以
爲牙兵其餘衛坊曲更巡邏備炊爨者皆當其任禁繫豪
猾逐去游手命寄居官分守要害延老儒與參謀議部分
既定甲冑登城諭以禍福既有謀翻城以應敵者執而
據賊戮之人皆屏息未幾渭南赤水華州華陰白水下邳
皆爲南軍所據賊楊萬李孝章率衆傅城自冬及春首尾
凡四月誘脅百方君誓死無二人知鳳激自奮賊不能攻
大定二年春正月官軍至賊始散走君空壁而出與官軍
合擊追奔數十里振旅而還君慮民之嘗陷於賊者不能
無罪諭使自陳其後捉殺使誅從亂者此邦之人獨賴以

免人亦感君之恩繪君像戶皆祠之趙可喬君墓志十四年起復

奉議大夫行大理司直騎都尉河南縣開國男食邑三百

戶太清觀記十八年官潞州同知趙思誠座中銘跋興學校申良佐轉

孟州刺史元道山集官至河東南路按察使工詩詞有聲於時

自號蓮峰真逸洪洞縣志文有座中銘石刻在襄垣太清觀記石刻在沁

源重立泰甯宮記石刻在華陰惠遠橋記石刻在洪洞興學

賦跋石刻在潞安學凌虛堂詩集中州興慶池李氏園詩石刻在華

戊申申天祿跋明多寶佛塔碑側題名甲申七月攷青

蓮寺題名大定戊戌鳳臺志三種均署蓮峰真逸

遼州文廟碑

碑高四尺一寸二分廣一尺九寸四分
二十行行五十一字正書今在遼州

遼州重修學記

聖朝以兵定天下天會以還戎車屢駕經營四方其於俎豆之事未遑議也及天 大定紀年

洪聖接統不殺之威足以警服遐裔寬仁恭儉之德足以措安海內隆平之運復見 今日稽古禮文之務燦然交舉

非口通國大都建立儒宮而荒山窮僻之處亦以不知儒為恥孟子道性善又曰夫道一而已矣蓋人稟自天之性非地氣所能拘遼州僻介山險民勞而貧然其心則與夫通國大都均舊有庠序兵火之後為人僦居餐塵薰染風雨摧剥將就頽圯前此來典是郡者多高官右列方且以式遏姦宄繕甲兵修城隍為事何暇及學館中間倅郡之彥雖時有修換然微不能具體 我太守趙侯早登科甲才名籍籍文詞之妙往往膾炙人口下車之明年慨然有一新之志適以貢

士顓頊轂張景華瀝願修之懇乃出已俸率先僚屬致官民
佐用者不謀而同且委威冠指揮使閭全監其役元總統焉
經始於春落成於秋嚮之頽垣壞屋鞠為園蔬者一旦興舉
廡舍翼翼賢像可繪殿宇眈眈 聖容益嚴有禮器以潔二
丁之祀有齋室以肄諸生之業至於材損多而益寡地隆下
而殺高雨不湫墊人得改觀閭口力焉口口蜀本荒僻有蠻
徼之風迨文翁始立學官遣司馬相如東授口經還教吏民
於是蜀學比於齊魯福建初亦未知學常衮為觀察口鄉校
訓藝文親加講勵與為客主於是民心大悅儒風一變與內
州等然則學館有益於世如此愚嘗反復言之簿書獄訟州
郡口職禮樂教化庠序之事專工於彼則斷刑決罰可著小
効於時垂意於此則移風易俗將收成功也遠蓋彼為治之

末此實治□本□□也風雨應時物無疵癘囹圄之內屢告
空虛是其政已成也郡政已成而吾□□□□他□首以
修飾庠序為心誠知治之本歟將見濯濯遼人為時俊英進
耀邦家退光閭里焉知不自比者學館而來也元寶□□其
事遂緝之以為書大定十四年八月吉日

從仕郎□□州□宰判官鄭元謹記

相□□趙□書丹

遼州鄉貢進士張景華篆額

□□大夫遼州□山縣令蘭嗣吉立石

少中大夫遼州刺史兼知軍事趙揚

通志金石記金遼州文廟碑大定十四年軍事判官鄭元
撰見金石存略按卽此碑碑題遼州鄉貢進士張景華篆

額縣令蘭嗣吉立石縣令上有闕文金史地理志遼州倚

遼山縣立石者必以倚郭之令故知爲遼山令判官鄭元

刺史趙揚又見先大夫廟碑

楊見州志職官金知州

碑言遼州舊有

庠序兵火之後將就頽圯時有修換不能具體我太守趙

侯早登科甲

今縣志趙揚下無登科事得此可補其闕

又曰下車之明年慨然

有一新之志經始於春落成於秋今縣志不詳揚涖州之

年以此碑立大定十四年考之則揚以十三年刺遼

下車明年

爲十

四年記文樸厚淵懿如記末垂意於此數語尤理郡邑者

所宜奉爲龜鑒蜀文翁闢常相固已然之效也碑內威寇

指揮使闕此金遼州之軍官今志亦宜載又今州志載趙

揚事殊略合兩碑觀之揚固儒吏而著循績者

記云早登科甲才名

藉藉文詞之妙往往膾炙人口又曰風雨應時物無疵癘
圖圖之內屢告空虛雖爲之屬者不能無諛然記先碑見

其教忠修文廟見其州志紀文廟始明故此碑修年及元
向學固非俗吏比也碑修年皆闕碑見通志金石記又蘭嗣吉大定十二年嘗
爲平遙令見郭明濟重修應潤廟記碑

先軫廟碑

碑連額高三尺一寸八分廣二尺二十三行行三十五
字正書額題遼州晉先大夫廟碑八字篆書今在遼州

遼州晉先大夫廟碑

孔子曰為君難為臣不易然則臣之道固不易乎盡智竭忠
匡國利民生樹鴻勲沒享元祀此在畎畝時所發之本願也
及夫盡智竭忠口國利民偶一眚之微末之能補一旦臨難
奮然不顧棄千金之軀示後世為臣之戒其身雖沒徒有忠
貞之節峻不可攀是豈為臣之本願哉不得已也春秋時晉
楚齊秦更伯皆以得士則昌而晉所由興特賴謀臣輔佐之

力域濮之戰走子玉猶賁育之戲嬰孺由是始啟文公之伯
般之戰擒三帥若狸狌之捕鼠由是克大襄公之烈縱橫妙
用不差毫釐皆先大夫為主謀也當文公初薨襄公嗣伯
秦師伐鄭取路於晉大夫不忍其侵軼發卒以抗使疋馬隻
輪無返者襄公聽其母秦嬴之言釋三帥大夫朝而問秦囚
公曰毋命釋之矣大夫怒曰武夫力而拘諸原婦人暫而免
諸國墮軍實而長寇讎亡無日矣不顧而唾厥後秦卒用孟
明果有王官之勝封殽尸而還遂伯西戎及晉敗狄于箕師
垂勝矣大夫念晉嘗違禮於君意以謂君之卹我惠不加討
我何面目以處狐偃趙衰之間況後世必以我為無禮於君
之人與其含羞苟活孰若敗狄而隕猶足弭難利國死且不
朽也遂免冑入狄師死焉狄人憐之歸其元面如生此其耿

概也嗟乎人均一死有輕於鴻毛有重於太山何哉在得其所
與不得其所耳箕之役大夫不復命蓋知死得其所也襄公
之釋秦囚猶解猛虎於陷穽此謀臣策士之所痛惜大夫進
而諫之既不及退欲追之恐弗追感發於中不得申乃不顧
而唾以招違禮之愆尚以取死然死豈大夫之本願哉比夫
荒唐之人事君一不遂其志則腹誅心恨靡所不致而事勢
既專歉隙既構三家擅魯六卿分晉流弊之極至有遠棄桓
文之功近希曹馬之迹者孰重孰輕宜乎芳聲義烈傳千古
而無媿也箕土之人迄今仰其遺蹟廟兒而嚴敬之俾血食
不絕余叨守是郡年七十有二將脫簪還共山之陽徘徊祠
下感慨不能已遂援筆述其行事以為之碑時大定十五年
十月十九日也少中大夫行遼州刺史兼知軍事趙揚撰

忠顯校尉遼州軍資庫都監耶律質書

從仕郎充遼州軍事判官鄭元篆額

武德將軍同知遼州軍州事蕭思寬立石

按遼州志箕山在州東六十里唐以此名州相傳先軫敗狄于箕卽此太平寰宇記遼山縣晉大夫先軫廟在縣南二里碑文爲金遼州刺史趙揚撰以今州志碑較損本盡智竭忠下闕匡字碑內將脫簪還共山之陽州志作將解組歸田志系後撰碑列原文應以碑爲正州志職官有金知州趙揚按金用唐制州有刺史無知州碑末作行遼州刺史兼知軍事趙揚此正金制州志列之知州內者襲宋官名也碑有軍資庫都監耶律質金史志諸州有軍資庫州志晉大夫祠在城南明洪武七年賜號爲晉大夫先軫

之廟今列祀典其山在今河南其縣以碑文將脫簪還其山之陽考之揚當卽其人或藉作歸隱之地亦未可知又按先軫敗狄之箕後人辨之以爲河外之箕在今蒲隰一帶水經注陽邑之箕尙非確解何況遼山之箕距晉益遠然先廟祀遼太平寰宇記已見則自唐來已傳訛固非由金元始碑見寰宇訪碑錄通志金石記

普恩寺大殿記

碑高七尺七分廣三尺三寸五分二十四行行五十二字正書今在大同縣

大金西京大普恩寺重修大殿記

諸佛菩薩之應世也亦猶哲王之拯弊或忠或質或文雖制治不同其趨一也世人徇達磨對蕭梁氏之言遂疑有爲功德不可復作而不知指示神地以直五王之福補理故寺當

獲二梵之報者釋迦遺訓具存貝典則崇飾塔廟興建寺宇
以示現佛菩薩境界蓋將誘接衆生同歸于善其為功德詎
可測量哉彼達磨大士方以妙元明心親提教外別傳之印
則於有為功德不無抑揚是亦因時揀弊耳非實貶也具願
力苾芻能克遵付屬而成就茲事其為功德尚何訾耶

大金西都普恩寺自古號為大蘭若遼末以來再罹鋒燼樓
閣飛為埃粉堂殿聚為瓦礫前日棟宇所僅存者十不三四
驕兵悍卒指為列屯而宣寂頓殊掠滅俘獲紛然錯處而垢
淨俄變殘僧去之而飲泣遺黎過之而增歎閱歷滋久散亡
稍還於是寺之上首通玄文慧大師圓滿者思童戲於畫沙
感宿因於移礎發勇猛心得不退轉捨衣孟凡二十萬與其
徒合謀協力化所難化悟所未悟開尸羅之壇闡盧舍之教

以慈為航遂其先登之志以信為門咸懷後至之恥於斯時
也人以湏達自期家用給孤相勉咸蘊至願爭捨所愛彼髓
腦支體尚無所吝况百骸外物哉於是輦幣委珠金脫袍絮
裘裘者相系于道累月逾時殆無虛日經始於天會之戊申
落成於皇統之癸亥凡為大殿暨東西朵殿羅漢洞文殊普
賢閣及前殿大門左右斜廊合八十餘楹瓴甍變於埏埴丹
雘供其繪畫棧椽梁柱飾而不侈階序牖闥廣而有容為諸
佛薩埵而天龍八部合爪掌圍繞皆選於名筆為五百尊者
而侍衛供獻各有儀物皆塑於善工辟容莊穆梵相奇古慈
憫利生之意若發於眉宇秘密拔苦之言若出於舌端有來
瞻仰莫不欽肅五體投地一心同聲視此幻身如在龍華會
上百寶光明中其為饒益至矣大矣不可得而思議矣圓滿

今年七十有四自惟

君恩佛恩等無差別成此功德志

實有在非獨為前途津梁也然此功德為於治安無事之時則其成也甚易圖於干戈未戢之際則其成也實難圖滿身更兵火備歷艱勤視已財貨猶身外影既捐所蓄又哀檀信經營終始淹貫時序皆予所目覩也則其成就豈得以治安無事時比哉始予築館之三年歲在庚戌冬十月乃遷於茲寺因得與寺衆往來首尾八十四年如一日也衆以滿之意狀其事以記為請記事之成要得其實今予既身親見之其可辭哉按寺建於唐明皇時與道觀皆賜開元之號而寺獨易名不見其所自今樓有銅鐘其上款識乃是清泰三年歲在丙申所鑄造也其易今名當在石晉之初或唐亡以後第未究其所易之因耳後之作者見其闕文儻得其本末為我

著之乃子之志也非特予志亦寺衆之所欲聞也

皇統三年二月丁卯江東朱弁記

少中大夫同知西京留守大同尹兼本路兵馬都總管府
事上輕車都尉濟陽郡開國伯食邑七百戶賜紫金魚袋
丁暉仁篆額

中憲大夫西京路都轉運副使上騎都尉魯縣開國子食
邑五百戶賜紫金魚袋孔固書

通玄文慧大師賜紫沙門圓滿提點

大定十六年丙申八月丁酉初一日癸酉三綱寺主沙門
惠蜀尚座行完都維那樓演立石 鴈門解遵一刊

按碑言金西都普恩寺自古號爲大蘭若三朝北盟會編
引范成大攬轡錄曰遼西京兩路大同府爲首又張棣金

虜圖經貞元四年以渤海遼陽府爲東京山西大同府爲
西京中京大定府爲北京東京開封府爲南京燕山爲中
都府曰大興又金史地理志大同軍節度遼重熙十三年
升爲西京府名大同金因之此可以證碑又言遼末寺燬
通元文慧大師圓滿者思重葺之與其徒募化經始於天
會戊申落成於皇統癸亥校年表戊申天會六年癸亥皇
統三年又碑云始予築館之三年歲在庚戌冬十月乃遷
於茲寺因得與寺衆往來首尾凡十四年校碑爲朱弁作
朱弁在雲中事以續通鑑攷之宋高宗建炎元年十一月
朝奉郎王倫爲大金通問使時傳雲馬識還至汴京詔趣
還問金人意復遣倫與閭門宣贊舍人朱弁見宗翰議事
二年五月通問使王倫始度河遂與其副朱弁至雲中見

左副元帥宗翰計事金留不違高宗建炎元年按年表爲
丁未二年至雲中留不遺則是戊申此碑築館之歲越二
年庚戌遷于寺故碑謂爲三年乃金天會八年也文作於
皇統三年癸亥距遷寺十四年與碑首尾合又碑云樓有
銅鑪其上款識清泰三年丙申歲所鑄按清泰三年後唐
末帝季年故下文有石晉初等語文尾署皇統三年二月
丁卯江東朱弁記續通鑑紹興十三年六月金人遣通問
使徽猷閣待制洪皓直龍圖閣張紹修武郎朱弁還行在
八月修武郎朱弁自金國還按紹興十三年卽金皇統三
年惟弁於八月始南還此題二月在未還以前故得作記
碑末署銜少中大夫同知西京留守大同尹兼本路兵馬
都總管府事上輕車都尉濟陽郡開國伯食邑七百戶賜

紫金魚袋丁暉仁篆額中憲大夫西京路都轉運副使上
騎都尉魯縣開國子食邑五百戶賜紫金魚袋孔固書金
史丁暉仁傳字藏用大興宛平人皇統二年登進士第調
武清縣丞又調磁州軍事判官遷和川令歷北京推官再
遷大理司直大定三年除定武軍節度副使改大理丞吏
部員外郎轉戶部郎中爲刑部郎中改祁州刺史又改同
知西京留守事遷陝西西路轉運使大定二十一年卒官
按傳暉仁同知西京留守在大定三年後不署其改官年
月證以此碑應爲大定十六年事可補史闕

懸空寺記并詩

碑高一尺六寸七分廣一尺九寸二十四
行行字不一字徑七分行書今在渾源州

大定拾陸年重九後二日天晴氣爽月朗風輕日□□草同

游邑之南六七里石峽橋棧閣若巴蜀之道則經商大驛路也風迴路轉仰自臨壑之數峰猶美目不繫捨信懸空之巖古之遺迹始自建興於何代又不知棲隱者口也明魏我之萬丈中焉鑿石為龕植木為榜上不至於山之巔下不至於陸地懸室置屋四山掩映似博壁之翠幘流水潺湲清聲之漱玉非丹青而圖畫者哉嗟乎一廢一興迄今幾千百年矣余閉目想之昔時游行樂所了然可數若比於斯未之有也真物多所韜之地也居此者以息其心俱忘物我久口富賢於浮雲甘受貧窮不憂戚弃骨肉侶棲枝宿鳥時口同居凭檻視行人往還有如移蹊不生七情屏絕六慾衣麻布食可以草木實為吾有形已知是患體輕清而圓同太虛遺骨骸而復歸地大過患難而不屈臨死生而不懼然後與天相

終是為常也訪二禪者乃敦朴之人也係雲中宣(亭)縣石佛
院僧也普慈四十有九住持不入俗門行滿七十二歲荷真
未嘗有憚相挈入季水乳難分順味猶周一日真大善知識
也始我樂而忘歸高述其遊焉故為記耳

識破塵緣萬事休翛然歸去罷追求踈人墨壁鑿石磴厭俗
懸崖置屋樓明月清風真衙用斲松瘦栢旻吾儔經年掩戶
絕賓客獨樂(玄)中(玄)更幽

在望村內頭陲僧 行口立石

望岩村施主 王公庭 馬信 馬口口 馬口口

此懸空寺記并詩懸空寺一統志在渾源州南磁窯峽內
石壁巉崖懸空結構樓閣相望下臨無地寺創自後魏此
刻未見著錄

關大王祖塔記

石高一尺三寸五分廣一尺五分十四行行十七字
末題一行行二十三字均正書今在解州東二十里

漢關大王祖宅塔記

義勇武安王世祖解人興於漢靈帝中平元年甲子輔蜀先
主佐漢立功伏以

大王勇略天資英謀神授盡忠義於先主不避艱難棄富貴
於曹公豈圖爵祿當時志氣曾分主上之憂今日威靈猶賜
生民之福今者本庄社人王興將一千五十四年前祖塔重
加完葺伏願

神靈降佑一境之中萬事清吉風調雨順國泰民安命開為
記略紀

大王威德之萬一深負惶恐大金大定十七年丁酉三月十

五日本州律學張開謹言

直下封村柳園社王興立石

朱士安刊

金大定丁酉至清雍正九年辛亥四百九十四年張學仁
續

按今解州志漢關聖先塋在州東十八里石盤溝三面條
峰前臨鹹海深藏雄秀實爲誕聖靈區墓麓有關聖祖塋
墓道碑又里許有常平村古廟相傳爲關氏祖宅有塔屹
立金大定十七年里人王興重修有碑記今攷記文寥寥
數語辭意近俗追敘原起處志文轉較此記爲詳文首述
義勇武安王之號據州志宋崇甯元年追封關某忠惠公
大觀三年加封武安王李焘續通鑑長編宣和五年正月
己卯禮部奏關某勅封義勇武安王今以從祀武成王廟

契勘從祀諸將例不得題諡號合稱蜀將武安王從之注

徽宗實錄曰武安王關某加義勇肅以爲禮部奏乃是去

義勇實錄誤也建炎二年三月二十五日加封壯繆義勇

淳熙十四年加封英濟

原注荆門志漢南加封記並同

據是武安之號始

於大觀義勇之稱定於建炎此仍稱義勇武安者蓋從祀

標題不書諡號而封勅中究未除此二字故後人仍復遵

用之耳又宋史禮志宣和五年禮部言武成王廟從祀除

本傳已有封爵者其未經封爵之人齊相管仲以下十三

人並各加封於是釋奠日東廡祀白起以下西廡祀吳起

以下關某合列西廡張之次其事當與志所引長編五

年正月己卯禮部奏相連特史筆刪繁不詳諸將封號爲

可憾也又案四庫館重定通鑑長編徽欽兩帝紀並缺近

人漢子潼所輯長編拾補宣和五年下亦無此條細釋州志引長編文與原書語氣脗合既足詳闕聖封號顛委且可補拾補所不及於碑文原書有裨匪淺矣金史選舉志律科進士又稱爲諸科其法以律令內出題撰是記之張開自署本州律學殆卽習舉是科者又地理志解州上刺史州隸河東南路畢沅續通鑑金大定十七年宋淳熙四年丁酉也碑見通志金石記

澤州裴刺史祠堂記

碑高五尺廣二尺四寸十九行行三十六七字不等字徑一寸行書額正書跋入行行五十一字字徑五分正書今在鳳臺縣

澤州裴刺史祠堂記

朝請郎直秘閣權發遣提點淮南東路刑獄公事借紫金

魚袋劉 焘 撰并書題額

忠義之感人豈有窮哉或見而知之則怒發上指義氣拂膺
扼腕抵掌企竦爵躍恨不得共刃而絕同牢而斃以不獲與
為歎或聞而知之則掩卷太息凝思遐想恨不得奮身同時
策名共代思九泉之可作凜千載之猶生以不可及為耻何
也忠義之名高於山岳榮於星斗貴於金玉夫人而知慕向
之也及其臨白刃冒重圍犯逆鱗蹈不測往往鬚髯如戟頰
同女弱垂頭喪氣甘著忍耻名莫高於王衍齒莫尊於馮道
或幸脫於一死或厯相於數君曾無汗顏見俚史筆若是者
其可勝歎哉故疾風動地而草不為屈急浪漂山而石不為
移稟於天資豈可強而能也舞陽學為勇非真勇也故至於
奉圖則變色殿平仲學為直非真直也故至於留問則失措

果如何邛使能置死直前則無是患矣人惟死生利害爲之動是以所觀變於前而所守易於內也東漢之末黨錮禍興士大夫急於名節視死如歸相習成風母妻敦勉以就鈇鎖其死之易如此五代之際庾耻道喪駢首束脅視北面事人如易傳舍而況武夫悍將其可責以必死是以穿窬草石偷生幸貴^恬不為恠其死之難如彼亦所習見然也於斯時也而有如裴刺史者是可謂拔角於鱗探珠於驪可不貴哉梁唐之閒李繼韜以莊宗義兒守澤潞既名之曰子矣乃以澤潞叛其父而降梁裴公一裨將不殞能為唐守澤畢死而不_去自非忠義內激豈可以較賢愚分逆順耶故曰人之相去如九牛毛豈虛語乎澤人至今懷刺史之餘烈一新廟良遠_甸子文以刺堅垂後則又知澤之遺黎不徼福焉祀乃以忠

義二百年前刺史為先茲舉也意氣風節凜然世表可以昭
無窮而裕不朽於法宜并得書然莊宗命存存審之救公也
曰一州易得約難得也有是言也宜公為之死故并著其語
約公諱云重和二年二月一日丁丑記

夫見危致命之謂忠臨事有勇之謂烈忠烈之號有國有
家者激勵臣子臨難無苟免見於忠義光昭史策使千古
之下風聲凜然死而不朽豈小補哉歐陽文忠公於五代
史得死節之士三人前刺史義公其一也出處行事殉名
死節忠烈之風備書史策宋國宣和年間天官尚書王公
孝迪奏加侯號忠烈廟錫旌忠淮南憲劉公燾為之記其
記非特文辭瞻麗鋪張忠義刊之翠銍班班然布在人耳
目百世不朽惜乎碑石斷折刊字漫滅鄉人武功將軍張

礎與進義校尉姚孝先造珂李道相與謀曰裴使君吾鄉之刺史也旌忠廟吾鄉之美事也若更數十年則侯之節義無得而攷焉相與各出已錢命工別刊于石以傳不朽使千古之下不特奉其蒸嘗抑亦使吾鄉之人子孫知忠烈之可尚焉姑以題其再刊石之歲月云 金大定十七年三月既望日忠武校尉前軍資庫都監雲騎尉朱百能跋 修武校尉郎元仲 進義校尉韓彥 進義校尉苗選 進義校尉龐茂口 道士郭景昭 道士劉抱

①

張通 劉康 元臯 劉淵 馬敦 安崧段楫 劉

明 李守中 樂守宗 上官昇 ②

石匠樂元

此金大定重刻宋重和劉燾撰裴刺史祠堂記裴約死事
見五代史死節傳劉燾字無言長興人湖州府志傳云燾
誼次子元祐三年進士時馬涓張庭堅等四人擅名太學
時號四俊燾年少亦負才初補太學生聞而慕之以刺謁
之曰不識可當一俊否涓等哂之燾復請曰何得見哂涓
等設詭計以困之曰每句當預約一字限於程試中用之
善者乃預旣而私試燾乃請字曰第一句須用將字其時
策問神宗寶錄燾對曰秉史筆者權猶將也雖君命有所
不受而況其他乎史筆爲第一聞者服之輿地紀勝引時
太學上庠錄蘇軾知舉讀其文曰必巖谷間苦學者中第三人廷對又
中甲科軾薦燾文章典麗可備著述科帥中山時以蜜漬
荔枝遺之詩末章云詩清真合與君嘗歸朝趙民彥嘗云

在虜中飽觀燕文尤善書筆勢道邁黃山谷云無言箋題
不類今人書江左復生羊欣薄紹之矣在館中時被旨修
閣帖十卷所謂續法帖者是也嘗注聖濟經編修道史有
遺文五十卷號南山集談志參宋書錄府志爲陸存齋所撰甚爲
該博然燕之官階未具如見此碑當可添入矣燕以能書
名石雖重刊而精神涌現尙有虎賁中郎之歎

座中銘

碑高五尺三寸三分廣二尺四寸九行行二
十五字跋四行行二十字正書今在襄垣縣

座中銘

古唐喬辰書

宅無一區不儼不賃而解宇足以居田無一畝不農不桑而
衣食足以厚家無一僕不傭不雇而得供已之人足以充部

曲世無一官不進不獻而藉任子之廢足以補職貢爾無致
主之述澤民之才今享福既已若是其用心宜如何哉若乃
富不知足貴不知止無厭之欲何時而已患中性之易流防
侈心之漸啓緬思古人尚且自懲勒几杖以識其過佩韋弦
以矯其情吾恐久而忘之也故書之為座中之銘

潞之通守喬公仲章父作是銘書座中以自戒辭明意切
誠有會于予心故刻石置之廳壁俾來者觀而思之亦足
少警云大定十八年八月望日東垣漫士趙思誠跋

襄垣韓林恒刊

按通志金石記坐中銘石刻喬展撰此銘刻於襄垣官舍
豈曾作令於是邑歟今檢潞安府志襄垣縣志皆言展爲
襄垣令然今揭本銘後有趙思誠跋言潞之通守喬公仲

章父作是銘書坐中以自戒辰必爲潞州同知

金百官志節度州有

同知一員無通判即以同知通判節度使事潞州昭義軍節度使非襄垣令也思誠跋云

置之廳壁俾來者觀而思之則思誠當爲襄垣令辰銘有藉任子之廕文則辰之先必勳閥事跡見太清觀記跋

斛律光墓記

碑高三尺二寸五分廣一尺八寸十七行行三十字正書今在絳州

祭法曰有功於民者祀之 咸陽王可謂能保全國家有

大功於民宜在祀典者也 王諱光字明月朔州勅勒部人

世載忠謹北齊社稷賴之以安不幸爲祖珽穆提婆輩所讒

口命而死惜哉 王之祠堂舊在州衙子城東北隅俚俗相

傳云 王嘗指此地曰吾死之後必葬於此若及百年當有

二千石爲吾守墳者後人遵其遺旨葬於此構諸孤墳之上

此理殆无足考信且州置於後魏之初而王歿於北齊之季則指葬之說不亦厚誣謹按守居園池記云池由於煬反者雅文安發土築臺為拒誅則廟基正臺之遺址殆長慶以後守土者憫王之勲業死非其罪因即其地而建為影堂晉天福間刺史張廷蘊增大其宇乎不然樊宗師号爲記錄細碎曾不一言及此固可見也然綿歷久遠由五季迄於今數百年間祭祀不絕吏民益敬而屢有靈應但時代寢遠棟宇傾圯不庇風雨者積有年矣大定庚子歲州關節度使同知石公攝領郡事以謂興滯舉廢君子之能事莅政之始已有意於增葺時

朝廷口旨禁絕淫祠州之境内毀徹者不啻數百屋王以有功於國故得廟貞一新公復命壁間皆繪王之勲業

所起至於祖穆之事則故不待形容而後知也僕因併書其始末以釋後人之惑使得專祀王之功而無愧焉

大定二十年八月 日

鄉貢進士孫鎮記

中議大夫同知絳陽軍節度使兼絳州管内觀察使上騎都尉武威縣開國子食邑五百戶賜紫金魚袋權州事石玠立石 男守貞奉 命書

按絳州志有孫鎮斛律光墓記卽此碑而所載文較碑爲略州志文自王字明月起今揭本多祭法有功於民者祀之數句碑所云影堂及晉天福間刺史張廷蘊增大其宇事見後晉創建斛律王廟記晉碑刺史張署官姓無名以此文知爲廷蘊碑又云大定庚子歲州關節度使同知石

公攝領郡事按庚子大定二十年金史地理志天會六年絳州置絳陽軍節度使石公者石玠碑末題大定二十年八月日鄉貢進士孫鎮記同知絳陽軍節度使權州事石玠立石男守貞書中州集孫鎮字安常絳州人高才博學嘗中省試魁承安二年五赴廷試賜第以陝令致仕年八十四卒有注東坡樂府歷代登科記行世石玠見絳州志金大定二十年刺史按絳金爲節度州無刺史當從碑作同知爲是

金大定宰相石琚玠或同族紀有石玠相距久疑非一人

龐整記

碑連額高三尺五寸廣二尺一寸二十六行行四十字額題龐整之記四字俱正書今在永濟縣

金河中府河東縣風陵鄉



□□□□張□撰

蔚□逸人張拱書丹

□□齒亂間侍 先子之官□□書碑余□□青之簡□□
蠹之笈求訪碩德耆儒以就且益自尔後遂潛心黃卷者三
十年擬致□□□□□□幸流離頁搖株守塗窮但掩
開塊坐止與周孔方策相對而已忽一日有叩戶剝啄聲起
視之□□□□黃冠龍師也因延之而語斯人遽擎跽而進
曰善信之祖教已逝祖妣王氏之□於前歲□葬時父龐整
挺志□石誓守□福寢處冢藏定省如在仍有警異數事縷
數於前祝予為父庶揚其美懇求再四義不得辭□直述其
事云龐公諱整在居河東縣風陵鄉□□村唯以畎畝為業
公為人敦厚頗樂天竺法屬怙恃繼□攀慕呼號殆將滅性
於大定二十年三月二日合柩營域窆葬之日義不顧生屏

去妻孥□遂而入終身之孝□□中敬愛存誠不啻生事
越初八日長男德源因往看省見公僵仆無炁救兩時頃方
甦以其孝思□□所至也□十八日于壙中覺有□惡□
□執心□回无避就意□日反為異香芬郁者僅旬浹以其
孝思不置壽載□騰之所至也洎六月□二日公以飲膳□
□河魚□梗□勝□□是夕有二人送藥來服之立愈以其
孝思感格神明之所至也□□□□□□□□□□
祠□□□艱苦可知以其孝思致敬而仰報鞠育之故□□
春秋五十□□范□□□□□□□□□□著姓□男四人
皆天性純孝內一子為道□□善信隸業於□村常志□□
□□二人□衣稚□□□□□之志噫天地之性人為貴人
之行□□於□我於龐公得之子嘗□□□□□至陳蕃傳

蕃為樂安太守郡舉孝廉□有趙宣者葬親而不閉塋隧因
居其中二十年後生五子計其□月皆□□地育生大怒曰
汝為人子之務因心之孝反誑時惑眾寢處豕藏孕育其中
誣污鬼神□嗚呼寥寥□百載之□□醜狀穢迹班班□著
于書若方之龐氏子□去霄壤矣予又嘗覽德縣之圖牒□
唐孝子姚□□行狀□以葺廬墓側□□同居後□為□□
旌大門閭于今輝映鄉□

今□天子在上□□□□□□□廣行見公之孝行達於宸
聰 詔下□□□□□□ 寵渥光大於一門亦將

移風易俗俾里閭小兒皆慕曾閔之行抑□貽□世之懿範
不其偉歟□□□黃綃景慕斯人尾勉濡毫庸贊休美其辭

曰

百行之宗 衆善之始 惟孝□稱 □□莫比 龐公不
匱 終身而慕 事死如生 無忘□跂 不閉埏埴 定
省廣中 厚德同報 疾首如蓬 □□之孝 移風易俗
万善□編 煥遺芳躅

大定二十二年十月八日□□源深溫善信等同立石

按碑題張

闕

撰蔚

闕

逸人張拱書通志金石記僅錄金孝

子龐整碑六字亦不及撰書人舊山西通志孝義龐整河
中人父早喪事母孝合葬塋域整卽日屏妻子自入幽隧
哀慕不翅生事其子源嘗入視整偃仆救之方蘇隧中忽
發異香後整孱困不勝夜有人送藥服之愈人以爲神敕
賜旌表今碑文雖漫漶以舊通志證之可得其概碑曰黃
冠龐師者卽子源也碑云有趙宣者葬親而不閉埏埴因

居其中云云卽後漢書陳蕃傳民有趙宣葬親而不閉埏

埴事後蕃以宣五子皆服中生按致其罪碑引此以喻龐氏子過宣懸絕

也其云唐孝子姚闕者宋史姚宗明傳河中永樂人十世

祖栖雲唐貞元中父戍邊沒塞上栖雲痛父死於邊廬於

墓次終身哀慕不衰河中尹渾瑊表其事詔加優賜表其

門名其鄉曰孝義社曰節義里曰節愛碑所云旌大門閭

卽其事也碑末有大定二十二年等字金史孝友傳言金

世孝友見於旌表載於史冊者僅六人得此碑可補其闕

絳州衙門記

碑高五尺九寸二分廣二尺八寸六分
二十四行行五十字正書今在絳州

復建州衙南門記

將仕郎絳州錄事判官張之綱撰

絳陽於禹貢為冀州之域於地志為晉分在秦列河東郡於魏為東姬州周明帝時始易是名隋開皇中乃移今治自罷侯以來為郡為州形勝之地不為不重矣迨我

皇朝以戶口繁阜城邑雄富升諸道節鎮之冠所部則州有二所隸則縣一十有三赫然為雄屏翰而使署枕西北一隅平原博敞高出危堞子城東南二門杜礧壯麗樹門將將其上則複屋握起榱桷輦飛軒檻縈紆悉飾以丹堊為廨署奇觀之首口是南門因遺火煨燼一椽一瓦靡有孑遺頽墉荒堞保障不完以迄于今十有餘年矣 節使 資政 韓

公 出守是邦不朞年政通人和廢者以之起弊者以之補承宣之暇一日顧遺址而歎曰是門也非唯衙署之標表又府庫囹圄在焉詎可使洞達閭闔而不為障限者哉官守相

繼因循不理是耶非耶即案行示官前後檢視議遠邇量事期計徒庸材用之費移文漕司支公帑錢千繩於是聚材鳩工兩取其雜役俾胥靡者充之丁丁登登極土木之巧美麗伉壯差勝舊制煥然一新斯形制也蓋出 公之經畫于

柱石于梁榱其材皆偉壯于丹雘于藻績其制非侈靡若夫山川風土之美人物邑居之繁可寓目而盡得之真足以示藩府之巨麗為四遠之壯觀始自孟秋迄于季秋□□告成噫以三月之績易十餘載因循之陋可謂勤矣之綱承乏屬吏奉 命作記詎敢以蕪累辭竊惟城郭損壞修完時制□於左傳與月令補於孟秋築於仲秋所以防姦宄戒不虞其可忽諸雖然事有堙而復興物有廢而復振必待其人矣非經濟閎達之才孰能與於此且謂我 公政化盡古良

守循吏之宜茲事也知所以急而復完之於以出政令謹禁
限時啓閉通往來切豈細耶一手足之力無出于民又得其
時制故闔郡悅之豈特新一方之弊將見大用於

朝堂而為天下之幸矣異日邦人覩此而懷去思之愛奚啻
甘棠之美哉於是乎引筆行墨敬為之書

大定二十三年八月十八日立石

監造官將仕郎絳州錄事判官張□

監造官承直郎行正平縣丞雲騎尉孟濟

安遠大將軍充絳州觀察判官輕車都尉吳興郡開國伯
食邑七百戶姚合

朝請大夫充絳陽軍節度判官騎都尉彭城縣開國男食
邑三百戶賜紫金魚袋劉□□

明威將軍絳陽軍節度副使兼絳州管内觀察副使上騎
都尉金源縣開國男食邑五百戶完顏守成

資政大夫絳陽軍節度使兼絳州管内觀察使上護軍南
陽郡開國侯食邑一千戶食實封壹伯戶賜紫金魚袋韓
錫

按碑題絳州錄事判官張之綱撰碑言絳陽迨我皇朝以
戶口繁阜城邑雄富升諸道節鎮之冠所部則州有二所

隸則縣一十有三按金史地理志絳州縣入解州縣六共
十四縣與碑不合疑當爲絳陽二州

金史地理志絳州絳陽節度使不言所管州此碑可補其

闕金史志絳州上宋置絳郡防禦使
天會六年升絳陽軍節度使碑所云子城據宋薛宗

孺梁令祠記開渠灌刺史牙城實始於隋又見石晉絳州

前軍事判官張榮創建斛律王廟記記云州城內子衙又
金孫鎮斛律光廟記

云州衛子城是也

其曰資政韓公出守是邦不暮年政通人和者

以州志

絳州志韓錫大定二十年絳陽軍節度使

合金史考之卽韓錫金史

韓錫傳字難老其先自析津徙薊之漁陽父秉休歸朝領

忠正軍節度使錫以廕補閤門祇候歷遷尙書戶部侍郎

籍水手於山東大定改元於遼東錫奔赴行在詔復前職

明年授同知河間府事遷孟州防禦使累拜絳陽軍節度

使改知濟南府事告老許之明昌五年卒傳不言何年爲

絳陽以大定二十三年八月十八日立石證之

云不暮年政通人和

是以二十二年爲絳陽

則以二十二年爲絳陽其云移文漕司者指

河東轉運司碑爲子城南門因火而燼節度韓公復修而

作碑末題銜有監造官絳州錄事判官張

闕

正平縣丞孟

濟安遠大將軍絳州觀察判官吳興郡伯姚合朝請大夫

絳陽軍節度判官彭城縣男劉闕明威將軍絳陽節度副
使金源縣男完顏守成資政大夫絳陽軍節度使絳州管
內觀察使南陽郡侯韓錫皆可為考晉故之助校金錫封
皆以本姓郡望百官志白號之姓完顏等皆封金源溫特赫瓜
爾佳光嘉此碑完顏守成即其證姚之吳興劉之彭城碑
刺皆同立大定二十三年

雄山先師殿記

石高四尺五寸四分廣二尺三寸二分
二十六行行五十字正書今在長治縣

重修先師殿記

林泉散人李淑篆

鄉貢進士李鈞書丹

鄉貢進士秦果撰

我聞過去諸賢聖抖擻塵勞脫□□利鹿衣百結不恥於文
繡糲食一餐不羨於膏粱遠則隱曜山林近則含華朝市或
在狝猴江或寄脩羅窟或聽鈴語而居鄴□或沉珍貨而歸
鹿門或面壁於少林或投跡於蓮社茲皆亦與人為徒也與
人為徒則有父子有昆仲有師友有眷屬所以異者□怒
癡持戒定慧耽虛好靜萬緣一空解脫游戲而已

先師有唐之枝屬名瓊沃白童□間雅好恬漠厭世務之紛
華喜空門之幽寂悟明心要遂落髮為僧輟晦姓名浪游雲
水故宗室史傳無得而聞中間適因罹難□露門閥世始知
其皇族矣諸方住處莫能備紀忽自沁州崇福院飛錫而來
廬于此山後人以其遺愛立方丈之室琢石為像歲時供養
前小有井去長溪不踰咫尺寒泉飛液洋洋其冽鄉曲疾疫

者取飲之往往獲安人以聖井名之白叟相傳云此

先師滄茗盥漱之用故靈異如此□是遠近求之絡繹不絕至貞元之末屋老且腐井渫半摧牧童作避雨之居樵夫為班荆之地虛簷冷落古木淒涼儻欲易而新之必有待於賢者次及丙子季冬中旬夜居人未息忽覩金燈四五出於南山飛騰往來□屈曲昇降衆人曰此聖燈也不易得共合□加額乘高望之正當丈室之上光明變現如火連空紅日浴海甫及移刻積漸收斂若非賢聖游止曷致是哉或曰非也山鬼木□變現亦然吾應之曰汝何謬之甚也

先師在焉鬼魅安敢變現哉是知琴高乘朱鯉而沉淵西真命青鳥以傳信佐卿化雲外之鶴伯陽發眉間之光金燈煥煌漫何疑哉本村李植等因獻歲送香火徘徊周覽顧謂衆

曰

先師繼踵難陀景行迦葉慈悲救度有濟於人者今敝漏若斯我輩得無愧乎衆人聞之翕然風靡各伐自己林木銓揀良材不中度者求帀四方盡出於囊金人人贊其誠心願施穀帛者頂背相望故功不踰載鼎新革故成輪奐之居起聳飛之勢彫梁鏤窠繡栢雲楣以致草木生輝峯巒□色於井北砌以巨石廣爲庭除上下嚴整咸與惟新以向者費用之餘持待詔李子玉改立師之法像蕙壁塑羅漢五百尊度物□形連山布景觀之者以爲楞伽清涼在於目前矣又率村衆漫崗被麓種松數千地靈贖秀不出十年鬱爲茂林加以聲帶縈紆翠幘環立來往游人相謂曰勝槩幽奇如行松門道中使人應接不暇非復向舊境也此殿經營於正隆丁丑

季春斷手於戊寅首夏予一日以事過蔭城故人李秉謂予曰元瑜書記翩翩致足樂也公久隱雄山

先師殿首尾目所親見請□爲記立之琬琰予以忘年之厚不能拒辭遂筆其實少加潤色翩翩而樂豈敢當哉系而爲之頌曰

陶川之東雄山西 先師之殿高□巍 優婆塞夷不思議 一切稽首來歸依 有如世尊說法時 居然遠在

摩竭提 我今作記勒隆碣 名與此山俱不隳

東至橫石脚 南至大嶺 西至西石門 北至古佛堂
南河

大定二十三年歲次癸卯九月一日本村李植立石

天黨董進刊

按碑題林泉散人李淑篆鄉貢進士李鈞書丹鄉貢進士
秦果撰鈎果均見大雲寺碑末題大定二十三年歲次癸
卯九月一日本村李植立石通志金石記有馬太初李植
墓表今未見長治金碑多植立蓋時之富而能施者雄山
見金張格詩可爲考金地名者之助

修大雲院記

碑高三尺一寸廣二尺六寸三十行行
三十五字正書今在長治縣蔭城鎮

新修大雲院記

鄉貢進士李鈞撰

鄉貢進士秦果書丹

鄉貢進士郭璋篆

習瑜伽大教住持沙門淨倫立石

蓋聞未始有物希夷混成云乎道者強名而已故釋氏以凝寂不昧謂之禪定老氏以有無一致謂之無為孔氏以離形去智謂之坐忘三者戶牖雖殊其揆一也我佛如來自周昭王二十四年利見迦維託生王室是時光騰星漢水溢江河現優曇花作師子吼憑五衍之軾闢八正之門摧三千大千之世界碎作微塵駢九十六種之邪魔同歸正受恢弘至道普濟群迷馬鳴龍樹導清源於前無着天親振芳塵於後至秦皇肆虐十人沙門自西極而來獄利房於渭汭及漢明感夢二九信使從東華而往遇摩騰於月氏由是京洛創白馬之名勾吳始建初之美自後遺文間出列剎相望澄什轍接於山西林遠肩隨於江左有青眼黃睛之說約有赤髭白足之談玄鳴呼法教之興自有時矣蔭城村大雲寺者道通大

師之首創也正隆中自本州千佛院擁錫南來愛雄山之秀氣慕先師之勝跡遂有結茅之志未幾遇

國家降賈名額大師笑曰吾雅志遂矣以茲詣官投狀納贖得賜大雲

勅額既而謂村衆曰欲化檀越共評建寺之所不亦可乎衆皆雲集欣然商議猶豫未決有李行等將村南已業地信心願施方尅日經營病而物故以法眷中淨德上人繼之貞節苦心未知所措本村李植素修梵學者一日謂村衆曰彼僧一旅人耳單弱無階乞米哀錢欲興緣事難矣我輩各種善根共為那首與上人募成前緒使異日昇堂敷座因漸入頓因頓入圓直超於彼岸者緣我輩之力也聞而和者翕然風靡遂鳩工傭材薙草開基曾不數旬立法堂厨舍未及汚墁

淨德復有返初之歎以道通弟子淨倫嗣之乃今院主也復與李植等勦力化緣構成佛殿僧室縱橫廣袤各稱其所瓦木一新前後完備以致丹楹刻桷雲夢藻井來往游人拭目改觀茲寺也左連神嶺則寒松珠檜而翠惹晴煙右接吹壚則杏花菖葉而歌耕春色疊巘崇巒村墟井邑處其南北焉或曰公之為文首以三教論之於披文之體有所迂闊吾應之曰實為疣贅以釋二家之矛盾也功起於大定己丑歲落成於丁酉年故人李芾屬予曰請公為記以傳不朽幸垂重諾予以友愛之仁又蒙見屬義不獲已姑紀其歲月焉

昔杜元凱以平吳之功刻諸二石一立於山一沉於水慮陵谷之遷變古之好名者也李植等建祠立廟功德難量迴視身後之名期於不墜故刻諸琬琰同乎古人而已

大定癸卯重九日清簡大德管内都僧正賜紫講經論傳
□沙門道□勸助緣天黨□□

校碑題鄉貢進士李鈞撰鄉貢進士秦果書丹鄉貢進士
郭璋篆校雄山元師殿銘亦果撰而鈞書者皆題鄉貢進
士固一時事也通志金石記碑言正隆中遇國家降賣名
額詣官投狀納經賜大雲勅額納錢賣度牒師號寺觀金
史謂始自世宗據碑則海陵實先行之矣碑後有跋云昔
杜元凱以平吳之功刻諸二石一立於山一沈於水慮陵
谷之變遷古之好名者也李植等建祠立廟功德難量迴
視身後之名期於不墜故刻諸琬琰同乎古人而已蓋與
前碑爲同時所立故援征南爲比雖擬人不倫然植之名
頗藉以存惜其文太支離也今校搨本跋文具存一如記

之所迹謂爲不倫信非虛語蓋李植不過一立廟功耳豈
能與杜預相較絜哉己丑按年表卽大定九年丁酉則十
七年蓋前後相去九年故碑文有三更寺主之事李植立
碑甚夥如寶雲寺新建佛殿碑記雄山先師殿碑銘皆其
所建先師殿碑同此一時立以撰人及年歲知之跋文尤
可證此碑立於大定癸卯重九日寶二十三年碑見通志
金石記

寶峰寺記

碑高五尺八寸五分廣二尺六寸五分三
十一行行七十四字正書今在襄垣縣

潞州寶峰寺記

朝請大夫沁州刺史兼知軍事上騎都尉京兆縣開國子
食邑五百戶賜紫金魚袋康吉甫撰

從仕郎同知沁州軍州事雲騎尉借緋魚袋毛應書丹

處天下之脊據形勝之隆者謂之天黨天黨之北數舍之地
有大蘭若名曰紫巖在山非山也無顛峯峻嶺之危居塵出
塵也有瑞草長松之異高盤秀氣南負朝陽平枕翠微遠依
疊嶂絕人間之俗濁有物外之清幽石泉漱而野鶴鳴落霞
飛而暮煙紫香風不斷和氣橫流樓閣玲瓏殿堂盤鬱簷楹
縹緲廊廡圓環凝畫彩以相鮮粲金碧以相射瑞光與嵐光
爭曜佛日暨皎日齊明宛若蓮宮迨非人世門外塵勞行客
之路庵中定惠衲子之香僧行同居聖凡共處一几清肅儀
軌高嚴迹其肇造之功始自先師之力神勞形悴手胼足脰
誅茅築址撥土建基經營六載成是道場先師者第一祖法
濟大師也姓卜氏世業棣州厭次人也師之遺行具載前文

此略明始末自七歲詣五臺山清涼寺出家禮秀公為師一日差為磨頭師憫其異類勞苦歎曰透靈別殼而有如此良可哀哉常以已力代之秀公因夜中退省其私于窓隙見而奇之公問曰汝何若是也師應曰形質雖異佛性一同公曰真法器也自此不以常人接之至十五歲落髮受具師曰丈夫削髮披緇辭親割愛本以生死大事為念豈可區區於細務之間汨沒形神乃辭秀公南邁至霍嶽山漏巖洞作是思惟昔如來辭人主之榮捨國王之位山居野處齋時一鉢樹下一宿未嘗再爾投身救虎割肉飼鷹為求半偈而捨全身希求無上菩提之道二祖慧可立雪斷臂皆以為法亡軀有如是苦行如是勇猛我觀此身得之幻化一聚客塵四大無主五蘊本空非真實相地水火風各歸其體耳鼻舌身一無

所有於中緣塵靈妄和合假名為心亦以消殞內外尋求必
竟無有身心可得凡所諸相今安在哉譬如水中浮漚旋起
旋滅認為灩淖無乃太愚老子曰吾有大患為吾有身及吾
無身吾有何患經云即佛即心即心即道心有罣礙道從何
得不生厭離而生愛著非出家兒遂斷左手以示猛厲專心
在道誓曰吾此去山林但以菜食木衣遇緣則止逢難則離
展轉經行至斯巖畔喟然歎曰此福地也勝緣在茲周匝相
地地與心合歡喜踊躍曰可以建佛廬由是發大至誠金石
可以貫神明可以通況於人乎況於有識者乎自此人心影
附凡興一事成一功見義爭先惟恐其後如身之運臂臂之
使指罔不率從以是結大因緣成大佛事復架澗上橋一座
長三十間有若鯨鯢跨海蛟螭垂空以濟不通其利弥博後

于并門資聖禪院創建磚塔一座高數百尺計費二十餘萬
嘉祐二年正月十一日于資聖禪院示以微疾一夕與門徒
談笑之間謂曰諸法因緣生緣盡法還滅天地及日月時至
悉皆歸吾今時已至矣謂諸仁者無常可畏各各回光反照
如救頭燃無貽後悔言訖怡然而卧逝至秋八月凡經半載
之餘膚髮潤澤儼若如生所謂去住隨緣生死自在門人哀
慕不已裊塑全體置於法堂西位事之如在無何天會間以
宋人不庭命 國相為大元帥出師南伐兵由此途出土
卒如林若熊若羆威震雷霆塵飛穹壤山岳謂之搖動江河
謂之沸騰相去甚邇屆寺西北長邪嶺師恐其兵至一過寺
門而掃地俱廢遂以無礙法身蛻質前途迺迎其帥至於道
左拱手而立帥問曰何人師曰老比聖帥曰所求何物師曰

山寺無力願求護持應答之間忽失所在帥至號令王軍有
敢秋毫犯寺者法從軍令兵卒晏然不敢損於一芥由是得
以保全解鞍之後帥詢求前路所請救護之人遍閱寺僧無
相肖者因循至師影堂見師曲肱而卧容止依然有若存者
帥驚駭曰此僧乃是與我問對者如此神力變化非凡流真
菩薩大聖人也伐宋功成旋師獻凱申奏

朝廷改賜寶峯寺昔梁武帝普通八年十月菩提達磨至金
陵武帝問曰如何是聖諦第一義師曰廓然無聖帝曰對朕
者誰師曰不識帝不領悟至後魏太和十九年十月達磨祖
師端居而逝葬于熊耳山起塔于定林寺後三年魏宋雲奉
使西域回遇師于葱嶺見手攜隻履翩翩獨逝雲問師何往
曰西天去又謂雲曰汝主已厭世雲聞之茫然別師東邁泊

孝莊即位雲具奏其事帝令啓壙惟有空棺一隻革履存焉
舉朝為之驚歎且師之脫質以法身前迎大帥及求以護持
佛門叮嚀付囑兵忤至寺訪問左右曰前途所請救護者詢
及衆僧一一求訪了不可得惟見空堂遺體冥然高卧則與
達磨大師隻履獨逝無以異也今昔雖殊而法身出入無礙
神通自在者佛佛一如且以自東言者有蔚蘿山金河寺普
賢菩薩度生於一境自西言者有鴈門五臺院文殊菩薩救
竟於一方此二大菩薩雖出三界常居世間起大悲心接引
群迷回嚮佛道每至大夏三伏炎酷之際各於臺上示現清
涼世界遇有虔誠懇禱要見祥瑞者即時為現圓光攝身光
或獅子隊仗或羅漢仙橋毘羅綿世界或菩薩真身如是種
種等神光若響之應聲影之逐形其化人也有如是聖驗凡

四方之內上臺遊禮者耳無不聞目無不舉皆發歸依敬信之心成就無量無邊不可思議廣大因緣自南言者則有天竺寶峯寺麻衣大士菩薩亦示教化于一隅較其功德則與文殊普賢二菩薩因緣福利相去又何遠哉吉甫昔於大定十三年十二月因奉

朝命審按河東南北兩路重刑經由是路邂逅聊以香火瞻仰諸佛聖像禮謁麻衣聖者遺迹粗得緒餘今第五代山主宗琛及諸宿德遠冒寒色不憚劬勞慮以時遷歲遠滅裂芳塵使後世不可得而聞焉謹來求以為文吉甫辭謝再三愈加懇切志不可奪吉甫謂曰保成者易經始者難豈不聞書曰父作室子肯堂矧肯構父菑田子肯播矧肯穫此昔人之所切戒也宜爾後代子孫祗承先業繼紹遺基克念前功無

忘祖德敬之慎之聊記云耳

大定二十三年十一月望日潞州紫巖山寶峯寺住持僧
宗琛立石

張垣韓希 同姪韓溢摹刻

校碑題沁州刺史康吉甫撰同知沁州軍州事毛麾書吉
甫麾並見沁州志又中州集麾字牧達平陽人大定十六
年舉學行特賜進士出身授校書郎入教宮掖歷太常終
於同知沁州軍州事有平水集金史世宗紀大定二十年
十月壬寅上謂宰臣曰校書郎毛麾朕屢問以事善應對
眞該博老儒可除太常職事以備討論通志金石記大通
寺釋德崇塔銘大定十九年校書郎毛麾撰至明昌三年
重修記聖亨碑記麾結銜爲前太常博士兼校書郎今此

碑題大定二十三年十一月立石則麾已自太常博士出
爲沁州同知以諸碑考之大定二十年以前麾爲校書郎
二十一年爲太常博士其出佐沁州則在二十二三年襄
垣縣志寶峯寺在縣西五十里卽紫巖山寺後周建興碑
言天黨之北有大蘭若名曰紫巖合

元棲巖寺碑天下寺以巖名者三上黨之

紫巖濟南之靈巖是也紫巖卽寶峯寺靈巖寺在今山東長清縣見金石萃編

碑又云天會間國

相伐宋功成申奏朝廷改賜寶峯寺按所云國相者卽宗
翰三朝北盟會編宣和七年十一月三日庚午中山府奏
探報到國相可下雲中府金史本紀天會三年十月甲辰
詔諸將伐宋伊勒齊貝勒宗翰兼左副元帥四年十一月
戊辰宗翰下威勝軍乙亥克隆德府碑云兵由此途經寺
西北長嶺者卽此時事至碑言法濟示寂後說國相事頗

誕而復引宋雲事以實之毋亦以其有不足取信者歟

龍祥觀記

碑高三尺七寸三分廣一尺九寸八分
十七行行五十五字正書今在黎城縣

黎城縣平賢鄉王曲村新修龍祥觀記

道家者流蓋出於古非特以所居壯麗矜銜於世俗而崇其
教門者哉其要在於遠囂塵守虛寂去華居實無為清靜而
已今而敦是道者誰歟吾於師而見之矣師本村人氏法号
可用張其姓也皇統間授業於潞城縣東白鶴觀夙鍾道性
謙靜柔殷不如輩酒善丹青從幼稚了弗與兒輩嬉戲事比
壯有室父母繼歿送死事畢厭塵俗捐妻子慨然有修真樂
道之志初隱於羊羔村崆峒山谷之石室十有餘載得服氣
煉神辟穀之術人莫之知先是有居此室者往往病其乏水

不踰旬而退泊師之到誠動神心虎豹遠跡盜賊弗侵居無
何石坼泉溜清冷而味甘汲多而不竭少而不溢病者飲之
得安于今人得以濟是時山寇嘯聚抄掠村堡官軍援險守
隘原野搜索殆遍由是舍彼而居此人皆嚮師之德喜師之
來族人張閔張琯首謀勝事於觀音殿左施地盈畝曰閔等
未暇興修觀宇奉此聊為棲止之地因鑿洞而處之仍命雕
三清像俾旦夕有所欽仰每暑濕頽圯慮不能久會張希楊
植楊緒楊聚張吉共願施地於石橋南廣闊平衍依山之曲
附水之陽柔柔朱棗芳彌川滿谷澗毛林蔽芳實篁盈篁夏
沼萍綠秋風稻黃水禽朝集以暮宿溪樹先春而後霜言卜
其地斯為最良師乃經始用建斯殿朴不至野拙不至陋富
者輸財貧者給役不踰歲而告成同門張遠一與有力焉大

定三年

國朝賜天下寺觀名額令弟子劉元正申請囑以觀前水泉時現瑞彩故給今額曰龍祥凡師之所處未嘗假勢豪貴托化於人而遠近自饋施者歲時不絕於道其德厚感人如此是歲祖師康崇賢以年老召適潞城請主白鶴觀事元正始專住持得嗣續之道築垣墉廊廊廡植松竹以為閑宴之觀闢戶牖以納虛明之趣齋厨客館芝殿雲堂聖像仙壇靡不完就大定十二年師復來歸循歷周覽雅合厭意居未周星而戶解越明年正月會葬於龍山之北大定甲辰十月予爲居辛安守先人之弊廬觀主劉元正攜道友馮君最即予爲記曰吾欲發明先師平昔之功行刻之於翠琰庶後來者知其締構之迹愈勤嗣續之心予固倅不能終弗獲已且喜其

人不忘師之德而又感其能盡肯構之力遂綴緝其言直書其事而為之記

大定歲次乙巳正月元日

潞邑進士王大用撰

古黎靳元冲書

布衣路亨篆額

太上法籙弟子知龍祥觀道士劉元正立石

門人王慶祥 劉志祥 張惠祥 鄭恩鏞

按黎城縣續志龍祥觀在王曲里金大定元年道士張可用建弟子劉元正奏請賜額進士王大用撰記卽此碑按碑始言師法號可用張姓皇統間授業於潞城東白鶴觀比壯父母繼歿初隱於羊羔村崆峒山谷之石室今縣志

崆峒山在五美里

舊割入平順乾隆縣廢仍來屬

羊羔村

志在漳河北

又言居

此室者往往病其乏水師居無何泉汲多而不竭少而不溢縣志張可用潞城人隱羊羔村崆峒山山乏水張拜祝泉流清冷味甘不竭不溢與碑合其云張希等施地於石橋南不踰歲而成卽縣志鄉人後爲築觀事其曰大定三年以觀前水泉時現瑞彩給額曰龍祥卽縣志大定三年賜額曰龍祥事至碑言山寇嘯聚抄掠村堡此在皇統之後大定之前又大定三年金賜天下寺觀額事亦可與史相參碑題平賢鄉王曲村新修龍祥觀記今縣志東曰平賢鄉共三十六村又濁漳水南至張堡又十里至王曲村卽碑之王曲村碑爲潞城進士王大用撰古黎靳元冲書布衣路亨篆額

公孫程二公祠詩

石高一尺二寸五分廣二尺三寸二
十三行行字不等正書今在平定州

余嘗述

公孫程侯之實于此尤詳以其地連三晉城枕九原俱以趙
氏之有洎北山以程侯之名西里有公孫所号雙祠古塚歷
代猶存歲時裡祀罔或有關其可傷者近歲晉陽而失載圖
經而弗拘蓋鄉民寡於好古有味於先賢之迹以此一郡之
如是況於其他者乎而作是詩以弔之豈太定乙巳上元南
陽何師常從道留題

杵臼程嬰二丈夫雙祠爰自兩城隅森森絡角嶽林古慘慘
西南棘塚孤計匿就誅忠莫及告成自殺烈應無湏知後志
圖經粗此事昭然失與拘

劉德立石 尹實等管勾 韓智模刊

按碑前刻何師常題公孫祠文後刻詩一章其曰城枕九原者謂忻爲晉九原也其曰北山以程侯名者謂忻之程侯山卽以程嬰名也太平寰宇記忻州秀容縣本漢陽曲縣地屬太原郡後漢末於此置九原縣屬新興郡又引十三州志漢末大亂匈奴侵邊自建安以西盡雲中雁門之間遂空建安中曹操集荒郡之戶以爲縣立新興郡領九原等縣卽此然則忻州有九原以建安內徙九原而立非晉九原可知且晉文襄時北境未越太原況於忻乎師常附會之誤可見隋書地理志九原郡秀容縣有程侯山寰宇記引水經注忻水東厯程侯山今酈注無此文大約師常之說起於南北朝觀程哲碑可得其概師常見忻州志

又按地連三晉城帶九原文見隋精道寺碑遺山集天慶
觀記吾州跨西岡而城岡占城之半是爲九龍之原檀弓
晉之九原水經謂潯沱經九原城北流此其地也按此與
師常誤同公孫里亦見州志碑立大定二十五年

寶雲寺碣

石高一尺四寸六分廣一尺六寸五分十六行行十四字
末題十二行行二十九字至三十一字不等正書今在長
縣治

乙巳仲春中休日遊寶雲寺主僧乞詩以此答之

盤西野老張格題

萬樹陰森蔭寶雲山如燕尾勢齊分崑開錦繡春深見林響
笙篁夜靜聞坐久爐香猶宛轉梵金花雨尚繽紛主人若許
來歸老同伴蒼官與此君

復用前韻

杖染莓苔衣染雲勝遊時恰過春分雄山秀色依欄見洶水
清聲俯岸聞物外煙霞常寂寂人間冠蓋謾紛紛老僧事業
真堪羨獨坐團蒲養躁君

過內王村

東山佳致未能忘細馬雙馳窈窕娘無數隔離村舍女半遮
嬌面看紅粧

離石東溪吳子承乏潞郡之支邑潞城簿幸獲時侍
教於

權鎮張公朝列節副先生誤蒙見接一日有上黨潛龍寺僧
淨明者來過且出先生游招提二長篇一絕句敬告之言
欲鑱翠琰而傳不朽且索跋尾觀其筆扛鼎挽牛之力詞

源滔滔如從肺腑中流出蓋

先生天才素學之分彼苦思牽強瑯珠後成氣象寒索欲望
其閩域豈九牛尾也又味其狀碓山淘水明秀之趣僧藍
梵宇幽曠之境便若身出塵界神游靈鷲也越厥絕句復
及謝安東山之賞清尚風流兩擅其美非特為精藍之世
珍抑亦照映千載將與謝安石伯仲於青史間也吳子亦
幸附名于其後輒不揆而書之大定二十五年四月朔旦
登仕郎潞城縣主簿吳希尹謹書

主僧淨通立石

上黨祁植刊

按碑前刻乙巳仲春中休日游寶雲寺主僧乞詩以此答
之盤西野老張格題七律二首過內王村七言截句一首

後刻離石東溪吳子承乏潞郡之支邑潞城簿幸獲時侍
教於權鎮張公朝列節副先生誤蒙見接一日有上黨潛
龍寺僧淨明者來過且出先生游招提長篇絕句然則此
詩卽張格作金史百官志諸節鎮節度使一員從三品副
使一員從五品百官志文階從五品下曰朝列大夫地理
志潞州昭義軍節度使權鎮張公者以碑末題年證之大
定二十五年格蓋以潞州節副權知節度使故云大定二
八年爲乙巳則詩作已七八年至是年方刻末有大定二
十五年四月朔旦登仕郎潞城縣主簿吳希尹謹書今潞
城志不載可据碑補長治縣志二仙山在城南四十里高
百四十八丈盤踞三里南連五龍山十三里上有寶雲寺
唐書通鑑諸書唐元宗嘗爲潞州別駕故有潛龍之目宋

張儀鳳上黨縣潛龍山寶雲寺記可證

靈贍廟碑

碑高三尺五寸四分廣二尺七寸三分二十六行行三十七字正書今在平定州西二十五里獅子山

靈贍廟碑

陰陽開闢元氣變化宣精於天成形在地結而為山嶽泄而為川瀆山川之作蓋與天地並矣故能出其雲雨育乎万物平定郡城之西二十五里有山曰獅子圖經所謂以形似而名之者也山之麓有石臺焉巍巍峩峩傑出郡右若巨人之冠帽然苜蒲自生其上南望黑水十里而近北顧石龕五里而遙蓋連亘之一山也宋世歲旱鄉邑之民在在處處舞雩於社禱雨無獲時有童子六七人來蓐牧於石臺之傍因置鉶於蒲下以禱為嬉見蒲之芒有露凝結若綴旒然墜而入

於鉞或晞而竭或潮而溢鉞既溢矣即有雲物觸石而出膚寸而合不崇朝而雨霖霖霑足徧乎境內自茲而後若時值常暘里人相率因倣彼童子置鉞於蒲下而有禱焉屢獲其應敏於景響由是大建祠宇於石臺之下名之曰蒲臺神而奉祀之宋崇寧三年賜廟額曰靈贍與黑水石龕二神同時得號黑水廟曰普澤石龕廟曰豐濟皆用部刺史西染院使高權之請也觀其感應之迹始見於童子之戲終救乎騷陽之災蓋靈氣之所宅雲雨之靈墟必有造物者尸之矣易曰陰陽不測之謂神豈不然乎或曰口晉則有言於魏榆者在漢則有鳴於異南者彼固為異事已書之史傳矣若夫山澤口氣礎潤雲生此陰陽交感之常自然而然者也又何足誌歟應之曰噫是不足與語至而言極者也且彼或言或鳴者

徒能為白祥於當世安能隨構輒應潤物濟時而若此者乎
又豈可同年而語哉廟屬陽泉里里中大姓范字好事君子
也一日率衆來叩子門而告之曰蒲臺神之事雖然載於晉
陽方志之書傳於上艾父老之口猶疎略訛舛懼其歷世寫
遠載書既略則傳者愈訛敢請於子詳而誌之將刊之於石
立之於廟傳之於無窮不亦可乎子義不得辭故詳其語以
告後之人乃作碑而銘之銘曰

天作高山 為鎮一方 以助造物 尸其雨暘 爰在
昔歲 亢陽為沴 鄉邑之民 舞雩以祭 童子何知
以禱為嬉 蒲芒有露 如旒之垂 自入於甌 或
潮而溢 即有雲物 觸石而出 以降膏雨 以蘇旱
苗 屢應其禱 曾不崇朝 一勺之水 膚寸千里

功被於人 血食於此 漢鳴於龔 晉言魏榆 彼時
雖異 彼迹寔殊 徒為白祥 徒濫民聽 安能濟時
隨禱輒應 膏我百穀 惠我生民 聖不可知 斯
謂之神 故詳其言 以告於後 碑而銘之 記以不
朽

大定丙午歲甲午月戊寅朔壬辰日丁酉時重建

東山趙懷允撰

本里范汝舟書

平潭石匠常俊男常貴 李朗

按平定州志蒲臺廟在獅子山隈宋崇甯元年建封靈贈
公金大定間修按碑謂宋世歲早有童子於石臺之旁置
瓶蒲下以禱為嬉見蒲芒有露凝結墜入瓶卽有雲觸石

而出兩徧境內由是大建祠宇名曰蒲臺神事頗靈異撰碑文者爲金趙懷允見元呂思誠記又碑謂宋崇甯三年用部刺史西染院使高權請賜額靈贈與黑水石瓮二神同時得號今校州志黑水廟在嘉山周世宗顯德二年封嘉應侯宋至和二年封善應侯崇甯三年封普澤侯石瓮神廟在州西三十里獅子山建於宋崇甯三年賜額豐濟王皆與碑合通志金石記趙懷允自署東山當是樂平人州志職官宋高權崇甯中知平定軍西染院使亦與碑合宋史職官志武選橫班東西染院使在西京左藏庫使下供備副使上政和二年易新名武義大夫平定在宋爲邊郡故以武臣知又職官階勳職事爲人易知者不必備列如此碑西染院使之類在唐爲宦者職在宋爲西班牙階政

和後易以新名終宋世不再見舊名故今著之

海會禪院法堂記

碑連額高三尺四寸七分廣一尺九寸二分二十三行行
字不等額題重修法堂之記六字均正書今在陽城縣
大金澤州陽城縣海會禪院重修法堂記

鄉貢進士端氏蘇璫撰并書

蓋聞作善今世者貴得其門修福來生者在知其路必歸依
於釋教庶不失其本心昔者時當訖錄于蒼姬佛始顯相于
天竺心淨行善識妙通真廣化自彼西方流風及茲東土門
開入正使人深造於聖門道謝四流誘衆咸趨於大道世拯
沉淪之苦法為舟筏而施凡曰有生普被兼濟能事畢矣勝
果成矣國雖壽於無量權乃息於無機於是脫屣於金沙池
中挂衣於娑羅樹上患身染塵劫故自歸于涅槃知名籍天

宮復往生于堯率其質雖盡其聖彌新然後畫像並出於多方寶剎森列於四海況此梵王宮宇面千金谷巖巒映門之修竹萬竿青遶院之茂林千蓋綠有寒泉湧出勝地翫堅石甃成曲池逼砌靈源吐作瓊珠之顆迎風細浪皺為琉璃之盤分派則走碧以橫門激石則成喧而盈耳故題其額曰海會禪院茲實古有之精舍最經年深者舊堂壞壁暗其丹青踈簷摧以風雨既卑且隘欲倒而傾其或崇建道場嚴作佛事齋席雖設迓衆實難使十方香火之人一會蓮社之友或露坐於他所或並立以羌肩解空說法者烏可遍授于衆人回心向善者不能諦聽于經教大定十季有住持住僧祐公上人發弘誓願不憚勤勞輒毀故以更新特易小而成大廣其制度增其基址重修法堂伍間更於次下創蓋法堂伍間

西挾院子屋陸間又於正殿後重葺厨屋前後共拾間庫屋
伍間僧堂伍間棟梁採於他山躬逾絕嶮柱石取於深谷身
履臨危人感義而借力相先工競能而施巧不緩樂事者衆
不日而成高低之麗構爭新上下之層臺聳翠朱簷飛峻射
曉日而紅照紅青瓦連空凝暮雲而碧生碧巖⑤宜其法教
開後學之苾芻祐公上人者下佛村人氏俗姓馬法名宗祐
字吉老夏臘六十有二歲自幼年受業本院從當日立事空
門經論通明器識宏遠其所修建無不壯麗費用約及於萬
貫幹辦祇自於一身推其功豈小補哉較其美是難能也余
因暇日問禪是字公語此苦心竭力之事深嘉其義為之記
焉 讀曰

事業興廢 皆由其人 能立事者 才智出倫 祐公

自幼不染俗塵 作佛弟子 心懷至仁 精舍有舊
孰更以新 公奮厥志 不憚苦辛 建立堂宇 服
勞一身 聖賢洞感 必饗而親 紀茲功德 昭示千
春 興爾來哲 相繼善因

監修建僧尊宿宗暉 管勾修建副院崇澤 知庫僧崇
明 木匠王俊 結瓦匠劉演 琉璃匠張珪 林茂
西封村賈述渾金正面釋迦佛一尊 南劉村楊口并妻
李氏粧塑觀音一尊 洗壁村馮氏同男司裕粧文殊一
尊迦葉一尊 進義校尉郭谷村馬溫粧普賢一尊 端
氏武安村張祐粧阿難一尊

大定二十七年歲直丁未九月望日住持沙門小師崇演
立石

馬翼題額

邑人趙潤刊

按陽城縣志龍泉寺在縣東三十里龍泉之側一名海會
唐乾甯元年建又云千峯寺與靈泉海會爲邑中招提之
勝按唐乾甯元年賜敕額事見後周王獻可龍泉禪院後
序碑題鄉貢進士端氏蘇瓚撰今撮本瓚字漫漶陽城縣
志蘇瓚海會寺重修法堂記與碑文同故知爲蘇瓚又碑
云梵王宮宇而於金谷巖巒按金谷累見後周宋龍泉諸
碑繹碑文以大定十年住持僧祐公重修法堂瓚爲記之
碑末所列西封南劉洗壁等村名可爲考金時地名者之
助今陽城志有封村里南留里劉村里南封里其皆襲舊
名者歟碑言分派則走碧以橫門激石則成喧而盈耳爲

海會寓名之義孤文單證存之可耳

應潤廟記

碑連額高三尺六寸廣一尺二寸五分十入行行四十五字正書額題重建應潤廟記六字篆書今在平遙縣

大金重建超山應潤廟記

圖經云超山在縣東南四十里高三百三十六丈峻越餘山城冢記云平陶東南有過山是也唐天寶六年改名超山山之谷越谷也谷行十餘里有佛舍百福寺也寺東有古神祠應潤廟也廟有井池乃禱雨取水之泉也宋宣和元年縣宰余彥和狀聞甘雨應祈之事因賜額曰應潤廟勅牒碑刻斯具存焉到今七十年矣大定十二年縣令蘭嗣吉亦祈雨即應勑構喜雨亭於縣署以明應潤之徵也近來自春徂夏雨澤愆期苗則槁矣民斯病矣知丞權縣寇

公 大夫以民為憂步至超山 應潤廟取水祈雨因瞻廟
貞毀禮殿廡摧圯祝曰如獲甘雨願輸俸錢修完祠宇言之
有信感而遂通雷以動之風以散之油然作雲沛然下雨旱
苗勃然興之矣雨隨水行信宿至縣三日而俾滂沱矣縣人
以紙千數千送水至東河上其焚紙灰皆東南飛去實神饗
之驗耳水還廡而復雨世謂迴馬雨也由是觀之廟曰 應
潤豈虛言哉即以清俸充修廡之費且闔縣鄉里願施瓦木
人工者源源而來皆 德政感神 降雨所致如此寇公
大夫字伯祥代郡崞縣人也自大定乙巳仲春來 丞吾邑
特權縣事庭無留訟獄無滯囚鄉無追胥境無盜賊優優然
了無事矣乃廣廨署修學舍葺弦歌之南樓引渠水於東郭
百廢皆起庶民咸和是以廡問治取比及升除士民已有去

思之詠況夫感 神澍雨過余公蘭令遠矣彼積薪環艾者
豈可同年而語至於修廡之際欲雨則雨欲晴則晴神意人
心合若符節陶瓦生而復熟 神髭夢以剪髮聞者莫不驚
嘆僉曰如斯 神應可不記其始終以永其傳其營建制度
爛然可觀前後正殿東西兩廡龜亭拜廳挾堂樓門繪塑一
新皆 寇公之所規畫也於是 神有所來饗人有所歸仰
峯巒枯柏掩映左右乃一方之壯觀不其韙歟僕為之記殆
非好談神異特紀其實而記歲月爾

皆大定二十八年歲次戊申中秋日太學主縣人郭明濟
謹記

鄉貢進士口秉鈞書丹

鄉貢進士劉甲篆額

奉訓大夫行平遙縣丞飛騎尉賜緋魚袋權縣事寇居麋
信武將軍行縣尉騎都尉完顏子儀立石

平陶史輯刊

按碑言超山在縣東南四十里高三百三十六丈唐天寶
六年改名超山平遙縣志超山在縣東南四十里一名戈
嶺山一名餽山視諸山獨異以其超出故名又水經注有
汜山疑卽今超山之地可以相證縣志百福井在超山百
福寺旱禱雨卽應病者祈飲多愈然則碑謂廟有井池乃
禱雨取水之泉卽此泉也宋宣和元年賜額事見余彥和
勅賜應潤廟記並勅賜超山應潤廟牒此碑謂勅牒碑刻
具存者卽是碑有大定十二年縣令蘭嗣吉今縣志有蘭
嗣吉爲縣令名但不著年月證以碑知爲大定十二年事

嗣吉又見遼州重修學記碑又云知丞權縣寇公大定乙
巳來丞吾邑按年表乙巳大定二十五年寇名居慶字伯
祥見縣志與碑合但宦績無傳其修學舍等事宜据碑補
碑以大定二十八年中秋日太學主縣人郭明濟撰記鄉
貢進士關秉鈞書丹鄉貢進士劉甲篆額鈞上關字校以
縣志應爲梁秉鈞志以秉鈞列於元以事實年歲攷之固
當作金代人可補碑闕後題奉訓大夫行平遙縣丞飛騎
尉賜緋魚袋權縣事寇居慶信武將軍行縣尉騎都尉完
顏子儀立石校子儀亦見縣志與碑官同志又有金大定
二十八年重修應潤廟碑在超山亦以禱雨有應也字方
硬有法文亦楚楚明晰志所列碑皆論文字然不盡可信
如周煒超山神祝文溫仁甫超山題名敘張標超山跋豈

皆以文字勝蓋亦藉地以傳也碑見通志金石記

龍巖禪院功德記

碑高三尺五寸廣一尺八寸十三行行五十字
至五十四字不等正書今在芮城縣水門村

維大金河東南路解州芮城縣□□管永昌□建立龍巖禪
院功德記

夫惟崇釋氏之法門必先嚴飾之梵宇所有前來舊寺耆艾
相傳其名曰謂之楊林□□歲月逾遠敘事難明又以基址
湫隘堂□塼殘不堪居止有住持沙門福詮泊門弟子二人
長曰□□次曰洪昌□□以蓮社淨行□□福董澄□□□
貴□通等是時與友□□□□遷移其院近於次南選擇
勝繁之地是以革故斯新創建精舍時有洪昌□□出離怖
四魔之多苦弃捨凡籠厭三界□□無常所以挺□奮金石之

志興土木之功盡力勤□不倦□勞剷除荆棘芟去萊蕪平
治地四十畝有餘□此良緣功積在乎自求豈從他得若乃
悟之者諸相非相迷之者將空喻空取捨未□是非交作惟
出於世者湏□砌玉以為堂亦乃安於禪者嘗□布金而□
院今即龍巖禪前□大定四年內住持僧福詮遍化諸人又
鑿其已有齊錢一百餘貫詣於所□□□官中納訖後降到
勅牒一道特賜龍巖之名額豈不□□□當其所建蓮宮烜
赫壯觀芮邑之一方□□□崢嶸堂廡隱映□□森聳射紅
□交輝碧瓦巍峩曳白雲而散亂踞斯此□□隣□□芮之
開原□接□齊□清境俯瞰□□□億年而不斷遙觀秀
色兩山四季以長青拴茲勝地堪住禪流興隆則□□於檀
□完葺則切憑於□□侶今者洪昌暨諸善友□□發菩提良

願析解脫勝緣是通意存三覺以圓明心契二諦而真理既
將有作之因定獲無涯之果迹乃修飾賢聖之功德備矣□
□告成適蒙里中知識□□□□□□□□□□□□□□□□
記事誠惟美義安可辭僕慙之不度聊將實紀惟願

皇帝三靈協慶萬寶皆昌永御無疆之玉曆丕承未艾之□
休

時大定二十□年歲在己酉五月

日記

按芮城縣志龍巖院在縣東北十五里水門村舊有楊林
古寺金大定間沙門福詮納錢百貫降勅牒賜名龍巖又
選擇勝地遷建禪院有記按卽此碑其曰前來舊寺相傳
謂之楊林者卽縣志所云水門村舊有楊林古寺也其云
大定四年住持僧福詮遍化諸人又罄已有納訖後降勅

賜名者卽縣志所云金大定間沙門福詮納錢降勅賜名也惟縣志云選擇勝地遷建者語殊未析以碑考之則實後賜額而先移建文多漫漶未列大定二十下有闕文以歲在己酉證之知爲大定二十九年碑見通志金石記

張商英霍山詩

石高一尺五寸廣二尺二寸十七行行十字行書今在霍州

霍山詩一首

本路提點刑獄公事張商英

驚翅垂三晉鼉趺距一方丹書亡智伯白髮詣秦王展定成姑射回巒揖太行水極千頃富源醜四渠長鳥不栖靈木雲常入帝鄉栢棧蟠老石瓜蔓散平岡叱吒生雷雹鞭笞役甯狼叢知雄氣象衛霍出平陽

衛青霍子孟此土人也

元祐戊辰正月十七日被

百決獄道過

是刹乃作此句 天覺

崇寧二年癸未九月二十日前山主僧清智

大定己酉歲重九月寺主僧源仲 知客僧道悟立石

按碑前刻本路提點刑獄公事張商英五言排律一首有
云丹書亡智伯白髮詣秦王者史記智伯率韓魏攻趙趙
襄子懼保晉陽原過從後至有三神與過竹二節令遺毋
卹襄子肅三日剖竹有朱書日子霍太山山陽侯天使也
子將使汝反滅智氏卒如其言遂祠三神使過主之太平
寰宇記晉州霍邑縣隋末喪亂武牙郎將宋老生屯兵於

此義師之至也。老生陳兵據險，師不得進。忽有白衣老父詣軍門曰：霍山神遣語大唐皇帝，若向霍邑當東南傍山取路，我當助帝破之。帝遣人視之，果有微道。高祖笑曰：此神不欺趙襄子。豈當欺我耶？卽其事。其云展定成姑射者，太平寰宇記晉州趙城縣姑射山在縣西二十里，其曰水涵千頃富源，醴四渠長者，寰宇記洪洞縣霍山在縣東北三十里，霍水出焉。水經注云：發源成潭，漲七十步不測其深。金天眷年，都總管定趙城洪洞兩縣水利碑，平陽府東北九十餘里有山曰霍山。山陽有泉曰霍泉，湧地以出，居民因而導之，分爲兩渠：一名南霍，一名北霍。山西通志：霍泉北渠，溉永樂等四十六村田五百九十二頃，有奇。南渠分五道：一卽南霍，一曰九成，與南霍實一道，以上下流分。

二名一曰小霍溉田一百六十餘頃一曰大霍一曰清水
溉田一百三十五頃有奇又清水渠引北霍遺漏之水溉田一千四十頃七十六畝有奇
宋慶厯五年有司推勘戶籍水數若干商英詩四渠者當
指宋慶厯以後霍渠言通志謂霍泉引渠始貞觀据天眷
碑則宋已立碑可補新唐書地理志之闕其曰衛霍出平
陽者史記漢書傳衛青霍去病皆平陽人寰宇記晉州人
物有衛青霍去病末題元祐戊辰正月十七日被旨決獄
道過是刹乃作此句天覺校長編商英以元祐二年自開
封推官提點河東刑獄戊辰者洺河東之次年廣勝寺在
霍山道過是刹者當指謂廣勝寺天覺好佛故也碑立金
大定己酉實大定二十九年